

Kart daa bzej Páblona' na' bseleen lao ben'ka' nonlilall' Jesucrístona' yell Rómana'

¹ Nad' Pablo, nak' wen llin che Cristo Jesúsá'. Chioza' gox wñabe' nad' gak' postl che', na' bene' lall' na' wi'a dill' wen dill' kob che'na'

² cheyi daa bchebe' gone', na' dii ben'ka' wdixjee daa golle' legake' kani'yi bzejgake'n lee Cho'a Xtilleena'.

³⁻⁴ Na' cho'en dill' che Xiine' Jesucrístona', beena' nak Xancho, daa goke' benech, na' goke' xiin dia che dii rey Davina'. Na' Espíritu Sántona' bli'e nan nake' Xiin Chioza', beena' nak ben' yel' wak choo yel' wak xen daa bibane' ladj ben' wetka'.

⁵ Na' daa nonlilall'nto' Jesucrístona', Chioza' ba goklene' neto', na' nzoe' neto' naknto' postl che Jesucrístona', na' bene' lall' na'nto' lljtixje'nto' xtilleena' kwenche doxen yell-lioni soa ben' gonlilall'gake'ne' na' wzenaggake' che', na' sho'e balaan.

⁶ Na' lenle ba gox wñab Chioza' kwenche gakle lall' na' Jesucrístona'.

⁷ Chzej' yog'lol-le, le' lle'le yell Rómana', le' ba gox wñab Chioza' nakle lall' nee na' chakile' le'. Xacho Chioza' na' Xancho Jesucrístona' gaklenshgagake' le' na' wzoagake' le' mbalaz.

⁸ Zigaate nia' le', ni cheyi daa ben Jesucrístonan' chak wi'a Chioza' yel' choxken che yog'loltele, la' doxen choe' ben' dill' ba nonlilall'le Jesucrístona'.

⁹ Chios, beena' chon' xshine'na' do yichj do lallaa daa chyixji'a dill' wen dill' kob che Xiine'na', nez nle'ile' tlizi chnabidee gaklene' le' kat' choe'lwillee.

¹⁰ Na' toshiizi chnabidee wi'e latj yidwia' le', na' shi cheenile' yid', lekze' kwee xnezin.

¹¹ Le chzelallaa yidwia' le' na' we'len' le' dill' daa gaklenan le' soachechchle gonlilall'chle Jesucristona'.

¹² La' cheenid' wtipch lall' ljwellcho daa nonlilall'chone'.

¹³ Le' ben' bish' na' le' ben' zan', cheenid' inezile zan shii ba goklallaa yidwia' le' per axt naa bikzan' gakan. Cheenid' yidwia' le' kwenche gakchachle gonlilall'le Jesucristona' na' soach ben' gonlilall'gake'ne' ladjlena', ka ba gok che ben'ka' bi nak ben' Israel yellka' gana' ba wyaa.

¹⁴ Nezd' chonan byen we'len' yog' ben' xtil' Crístona', ka ben' griego na' ka ben' bi nak ben' griego, ka ben' sin' na' ka ben' bi nteyi.

¹⁵ Daan, cheenid' lezkka' chixje'id' le' dill' wen dill' kob che'na', le' zoale Rómana'.

¹⁶ Bi chiyii chido'id' wi'a dill' wen dill' kob che Jesucristona', la' nsa'n yel' wak che Chioza' kwenche yislan nottez ben' gonlilalleene', zigaate ben' Israelka', na' lezkka' ben'ka' bi nak ben' Israel.

¹⁷ Na' dill' wen dill' kob che'na' chliin cho' nakan goncho yiyakcho ben' li ben' shao' lao Chioza'. Na' chzajniin cho' chiyal' gonlilall'chone' na' bich bi de sto dii gaklenan cho'. Kon ka na Cho'a Xtilleena': "Beena' nak ben' li ben' shao' daa nonlilalle nad', beenan' ibane'."

¹⁸ Yel' zak'zi che Chioza' za'n yabana' ni che ben'ka' bi chzenag che' na' chongake' chiya dii

mal, diika' chsej chllongakan gombia'gake' daa nak dii li.

19 Daa cheeni Chioza' inezgakile' che', ba nezkzgakile'n, la' Chioza'kzan ba bliile'n legake'.

20 La'kzi bi chle'icho Chioza', chle'icho diika' bene'na' chakbe'icho ka nake'. Daa bxe bsile' yellioni nakbia'cha nake' Chios na' yel' wak che'na' biga te cheyin. Na' bibi de dii wda'i ben' inagake' bi nezkzgakile' shi zoe'.

21 La' la'kzi nezkzgakile' zoa Chioza', bi choe'la'ogake'ne' ni bi choe'gake'ne' yel' choxken. San yoolə yichjgake' diika' bi zakii na' nchol nnti yichjlall'do'eka' daa bi ntegakile'.

22 La'kzi nazgake' nakgake' ben' sin', daa chongake' chli'n nakgake' ben' bi nteyi.

23 Lwaa dii nan koogake' Chioza' balaan, beena' biga te cheyin, lwaa lsak' benecha'la, ben'ka' chde cheyin, wloogake' balaan, na' axt no lwaa lsak' ba ze xan yabana', na' lwaa lsak' ba zoa tap ni'a na'yin, na' lwaa lsak' ba chxob le'in.

24 Na' daa chongake' ka', Chioza' ba wchoonlallee legake' kwenche gonchgake' dii zbanka' cheeni beli chen che'ka', na' benlen ljwellgake' diika' nak zban.

25 Lwaa dii nan shajle'gake' daa nak dii li che Chioza', wyazlall'chgake' daa nak de wxiye'. Be'la'ogake' diika' bxe bsil Chioza' na' wloogake'n balaan lwaa dii nan koogake' le' balaan daa bxe bsile' legakan na' chidolee we'la'ochone' toshiizi. Kan' nakan.

26 Daan, Chioza' ba wchoonlallee legake' kwenche gonchgake' dii zbanka' cheeni beli chen che'ka',

na' axt noolka' chiyat'len ljwell noolgake' na' chongake' daa bi noe' Chioza' latj gongake'.

²⁷ Na' ka'kzə beŋ' byoka', lwaa dii nan soalengake' noolə, chibalgakile' chiyat'len ljwell beŋ' byogake', na' chonlen ljwellgake' daa nak dii zban. Na' chzak'zi'len beli chen che'ka' yel' zak'zi'na' daa chidol'gake' daa chongake' dii malka'.

²⁸ Na' daa bi goklall'gake' wzenaggake' che Chioza', wlej yichje' legake' kwenche gontegagake' dii mala' kon ka nan loo yichjlall'do'eka' daa nxinj.

²⁹ Shgal' dii bi yejni'alalii chongake', choe'gake' cho'a xbayi beli chen che'ka', chzelall'gake' gat' kwe'gakile', chibagakile' gongake' dii malka'. Nakgake' beŋ' xe' beŋ' xga', beŋ' wen xya, beŋ' wishagdilə, beŋ' wxiye', beŋ' chibayi gon mal che beŋ', beŋ' wıchtıj dill',

³⁰ beŋ' chyilj chzan xtil' beŋ', beŋ' chakzbani Chioza', beŋ' bibi nalli, beŋ' cha'sibə na' beŋ' chshalj chshon. Chiyiljlall'gake' bi dii mal gongake', bi chzenaggake' che xaxna'gake',

³¹ bi ntegakile', bi chongake' daa chchebgake', bi chakgakile' beŋ', ni bi chiyesh'gakile' beŋ'.

³² La'kzi nezgakile' ba bchoglo Chioza' chiyal' guet beŋ'ka' chon ka', zizikchli chongake'n, na' axt chiba chizak'gakile' kat' chon beŋ' yoblan.

2

¹ Na' li' naa, nottezə nako', kat' chchoglo' che beŋ' nape' dol' lao Chioza', lekzka' che kwınon' chnio', la' lenkzo' chono' diika' chongake', na' bibi de wda'ilo'n ıno' bibi xto'loo de.

² Na' nezicho Chioza' chone' kon ka chiyaḷ' gone' kat' chḥogloe' sak'zi' beṅ'ka' chon dii malka' nak ka'.

³ Na' li' no' che beṅ'ka' chon dii malka' napgake' dol', bi gakkzilo' wilo' lo yel' zak'zi' che Chioza', la' ka'kzan chono'.

⁴ ¿Achakzilo' bi wsak'zi' Chioza' li' ni che daa chono'? ¿Abi chakbe'ilo' ni che yel' beṅ' wen che'nan' chiyesh'lallile' cho' na' chape' yel' chxen-lall' checho, daa cheenile' yiyaj yilenicho che dii malka' choncho?

⁵ Per daa nako' yichjlall'do' cheḥ na' bi cheenilo' yiyaj yilenilo', kwintezo' chḥkwa' chti'azo' yel' zak'zi'ka' illaglo' kat' illin lla wḥoglo Chioza' che beṅ' kon ka chiyaḷ' gone'.

⁶ La' Chioza' gone' ka gak che to to beṅ' kon ka chidolee.

⁷ Beṅ'ka' zoatezi zoagake' chongake' daa nak wen kwenche sho'gake' balaan, wi'e yel' mban chegake' zejli kani na' biga llia ile'gakile' yel' wita'.

⁸ Na' beṅ' yaalall'ka', beṅ'ka' chzoagake' ka'lə daa nak dii li na' nogake' diika' bi yejni'alallii, wsak'zi'e legake' daa le chlllee legake'.

⁹ Yel' zak'zi' wal yen ile'i yog' beṅ'ka' chon dii mala', zigaate beṅ' Israelka' na'tech beṅ'ka' bi nak beṅ' Israel.

¹⁰ Per beṅ'ka' chon dii wenna', sho'gake' balaan na' soagake' mbalaz, zigaate beṅ' Israelka' na'tech beṅ'ka' bi nak beṅ' Israel.

¹¹ La' Chioza', tlap chone' yel' josḥis, aga nakzi beṅ' chakile'.

¹² Yog' beṅ'ka' bi nombia' ley daa bzej dii Moiséza' kwiayi'gake' shi bengake' dii mala', la'kzi

bi ne_zgakile' daa nan. Na' yog' be_n'ka' be_n dii mala' na' ne_ztegakile' daa na leya', choglo ch_egake' kon ka na leya' gak ch_egake'.

¹³ La' kono yiyak be_n' li be_n' shao' lao Chioza' daa nombia'ze' leya', san beena' chon kon ka nan, len' yiyake' be_n' li be_n' shao' lawe'na'.

¹⁴ Ka nak be_n'ka' bi nak be_n' Israel na' bi ne_zgakile' bin na ley che dii Moiséza', shi tobia'lozgake' chongake' ka na leya', nakbia' yoo to ley loo yichjlall'do'eka'.

¹⁵ Na' daa chongake' ka', chli'n yoo loo yichjlall'do'eka' daa cheeni leya' gongake'. Na'ch yichjlall'do'eka'kzə chonan ka chakbe'gakile' shi dii wen wa shi dii malan bengake'.

¹⁶ Kan' gak llana' gon Chioza' lo na' Jesucristona' wchogloe' che diika' yoo loo yichjlall'do' be_n' yellioni, kon ka na dill' wen dill' kob che'na' daa cho'a dill'.

¹⁷ Na' li' nako' be_n' Israel, chakilo' nako' be_n' wen lao Chioza' daa ne_zilo' daa na ley che dii Moiséza' na' chep cha'lalloo daa nombi'o Chioza'.

¹⁸ Chakilo' ne_zilo' daa cheeni Chioza' gono' daa chli' chsedi leya' li' gono' daa nakch wen.

¹⁹ Chakilo' wak koo be_n' lo nez li che Chioza' na' gaktio' ka beeni' lao be_n'ka' chda lo yel chol'a'.

²⁰ Na' chakilo' wak wzajniilo' be_n' bi nteyi na' wakte wli' wsedilo' be_n'ka' bin' shajni'yenii daa nombi'o leya' daa nsa' do ka nak yel' chajni na' daa nak dii li.

²¹ Na' shi li' chli' chsedilo' be_n' yoblə, ¿berache bi chli' chsedi kwino'? Na' shi chsedilo' be_n' bi kwane', ¿berache li'lə chbanzo'?

²² Na' li' chsedilo' be_n' bi chiyal' soalene' nool bi

nak nool che', wa beṅ' byo beṅ' bi nak beṅ' che',
 ¿berache li'lə chonzo' ka'? Na' li' chwiilo' lwaa lsak'
 diika' choe'la'o beṅ', ¿berache chzi' chbanzo' bi de
 loo lill xlatjinka'?

23 Chshalj chshono' daa nombi'o leya', per chñit
 chdio' Chioza' daa bi chono' ka nan.

24 Dii liyen'nan na Cho'a Xtill' Chioza': "Ben'ka' bi
 nak beṅ' Israel chñegake' zban che Chioza' ni chele
 daa chonle mal."

25 Dii li seṅ daa le circuncisión daa yoo kwerp
 cho'na' zak'kzin shi chzenago' daa na leya', per shi
 bi chzenago'n bibi zjanayi daa yoo seṅna'.

26 Na' shi beena' bi yoo seṅna' chone' ka na leya',
 lao Chioza' nake' ka beṅ' yoo seṅ.

27 Na' beena' chon ka na leya' la'kzi bi yo'e seṅna',
 yili'e lawo' napo' dol' daa bi chono' ka na leya' la'kzi
 nombi'on na' yootio' seṅna'.

28 Bi gakzilo' nako' dowalj beṅ' Israel daa chono'
 yog' diika' yoolocho choncho cho' beṅ' Israel, ni
 daa yoo kwerp cho'na' seṅna'.

29 San dowalj beṅ' Israel nak beena' nonlilall'
 Chioza' do yichj do lallee, na' daa ba bikob Espiritu
 che'na' yichjlall'do'ena' nakan ka seṅna' daa chli'n
 nake' lall' na' Chioza'. Na' che beenin we' Chioza'
 xtillee chone' wen, aga beṅ' yell-lionin.

3

1 Na' ¿bera yel' goklen che beṅ' Israelka' de?
 Na' ¿bera banez si'gake' daa yoogake' seṅ daa le
 circuncisión?

2 Dii xen wal banez chegake' de. La' zigaate,
 legaken' be' Chioza' Cho'a Xtilleena'.

³ ¿Anti chakile ni cheyi daa bi chajle' bal ben' Israelka' che', ba wlej yichje' legake'?

⁴ ¡Bi nakan ka! Chioza' toshiizi chone' ka ba bchebe' gone' la'kzi yog' ben' yell-lioki nakgake' ben' wxiye'. Cho'a Xtilleena' nan:

Daa nchogbi'o gak che ben' saaxyana' nakbia'chan
zejan shli,
na' gakbe'gakile' chono' yel' joschis kon ka chiyal'
gakan.

⁵ Na' shi dii mala' choncho chli'n Chioza' nake' ben' li ben' shao', ¿bera inacho, lla? ¿Ainacho Chioza' bi nake' ben' wen daa chsak'zi'e ben'ka' chon mal? (Nia' ka' daa chaki ben' yell-lioki ka'.)

⁶ Per ¡bi nakan ka! La', shel'ka' Chioza' bi nake' ben' li ben' shao', aga wak gone' yel' joschis che ben' yell-lioni.

⁷ Na' zoa ben' nagake', shi yel' wxiye' chechona' chli'n yel' li che Chioza' na' chisgolan balaan che'na', ¿biche naze' nakcho ben' saaxya, shka'?

⁸ Na' daa chakgakile' ka', wnaljagake': “Goncho dii mala' kwenche sho'che' balaan.” Zoa ben' nagake' kan' chli' chsedinto', per bi nakan ka'. Na' ben'ka' naz ka' chidol'gake' yel' zak'zi' che Chioza'.

⁹ ¿Nakra lla? ¿Anakchnto' neto' ben' Israel ben' wench aga ka ben' yoblə, lla? ¡Bi nakan ka! La' ba wniakz' yog'cho, ka neto' ben' Israel na' ka'kzə ben'ka' bi nak ben' Israel, toz ka napcho dol' lao Chioza' daa ba bencho dii mala'.

¹⁰ La' Cho'a Xtill' Chioza' nan:
Kono ben' li ben' shao' zoa, ni tlišee.

¹¹ Ni to ben' bi chajniile' daa nak dii li,
ni kono zoa ben' chiyilj Chioza'.

¹² Yog'z ben' ba wlaagake' lo nez lina',
na' yog'zgake' nxinj yichjlall'do'eka'.

Ni togagake' bi chon dii wen.

Ni tlish' beṅ' chon wen bi zoa.

¹³ Ka zban chla' to loo ba che beṅ' wet dii nyalj, kan' nak dill' zbanka' chchej cho'a lolleeka'.

Kon cho'a lolleeka' chziye'gake'.

Na' ka yierb che beṅ' nak dill'ka' choe'gake'.

¹⁴ Lillinzə chyishjgake' bia' blag' che beṅ' na' choe'gake' dill' zi'bia'.

¹⁵ Bi nallgakile' chittezgake' beṅ'.

¹⁶ Gattezə zejgake' chlliayi' chlliadegake' na' ch-googake' yel' zi' yel' yesh'.

¹⁷ Bi nombia'gake' bi daa ne' soalengake' beṅ' mbalaz.

¹⁸ Bi chall chllebgake' gon Chioza' xya chegake'.

¹⁹ Na' nezicho beṅ'ka' nagake' chongake' daa na ley che Chioza' chiyal' gongake' doxen ka nan. Na' daa kono gok gonan, ba bhoglo Chioza' che yog'lolcho, cho' beṅ' yell-lio, ka neto' beṅ' Israel na' ka beṅ' bi nak beṅ' Israel, napcho dol', na' ni to kono gak ina: “Bibi dol' nap'.”

²⁰ Daan, ni to beṅ' bi gak ine' nake' beṅ' li beṅ' shao' lao Chioza' daa chone' ka na leya'. La' leya' chonan ka chakbe'icho nakcho beṅ' saaxya.

²¹ Na' naa Chioza' ba bliile' cho' nakan goncho kwenche yiyakcho beṅ' li beṅ' shao' lawe'na', na' aga daa goncho ka na leyan'. La' ka leya', na' ka diika' bzej dii beṅ'ka' wdixjee daa goll Chioza' legake', toz ka choe'gakan dill' cheyin.

²² Chioza' ne' yog'lol beṅ' gonlilallee Jesucristona' yiyake' beṅ' li beṅ' shao' lawe'na', nottezə nake'.

²³ La' yog'lolzə beṅ' bxinj blengake' na' ni to kono nak dowlj beṅ' wen ka nak Chioza'.

24 Per daa nak Chioza' ben' wen, chiyone' ben' ben' li ben' shao' daa wdixj Cristo Jesúsza' saaxya che'ka', na' bibi zak'gakile'n.

25 Chioza' bselee Crístona' blalj xchene'na' na' wite' ni che saaxyaka' bencho. Na' ni che xchene'na', nottezə ben' gonlilalleene', Chioza' yizi'xene' saaxya che'na'. Na' ka' chli'e nan nake' ben' chon daa nak shli. La' daa nape' yel' chx-enlall', bene' ka'z saaxyaka' ben ben' kana' bin' wselee Crístona'.

26 Na' naa, daa bselee Jesucrístona' chli'e nake' ben' chon daa nak shli daa ne' nottezə ben' gonlilallee Jesúsza' nake' ben' li ben' shao' lawe'na'.

27 Kono gak wshalj wshon ine' nake' ben' li ben' shao' lao Chioza' ni che ba bene' ka na leya'. La' aga no chon doxen ka nan, san Chioza' ne' nottezə ben' gonlilallee Crístona' nake' ben' li ben' shao' lawe'na'.

28 Na' ba nezicho chiyakcho ben' li ben' shao' lao Chioza' daa chonlilall'cho Jesucrístona' na' aga daa choncho daa na leyan'.

29 ¿Achakile Chioza' nake' Chios che to ben' Israelka'zə? ¡Bi nakan ka! Lekzka' nake' Chios che ben'ka' bi nak ben' Israel.

30 La' toz Chiozan' zoa, beena' chiyone' ben' li ben' shao' ben'ka' chonlilall' Crístona'. Na' toz ka chone' che nottezə ben' chonlilalleene', ka ben' Israel, ben'ka' yoo sen daa le circuncisión, na' ka ben' bi nak ben' Israel.

31 ¿Achakile daa chonlilall'cho Jesúsza' chzoacho leya' ka'lə? ¡Bi nakan ka! La' nezicho nakan to dii zakii.

4

1 ¿Bera ka inacho che dii xozxto'cho Abrahamá?

Nak gok biyake' ben' li ben' shao' lao Chioza'.

² Shel'ka' biyak dii Abrahama' ben' li ben' shao' lao Chioza' ni cheyi diika' bene', zaklja bshalj bshone' lao ben' yell-lioni, per aga lao Chioza'.

³ La' Cho'a Xtill' Chioza' nan: “Dii Abrahama' wyajli'e che Chioza', na' Chioza' wne' nake' ben' li ben' shao' lawe'na'.”

⁴ Kat' to wen llin chkaa laxje', bi nakan to dii chzani ben' cho'ene', san nakan dii chiyal'kz wi'ene'.

⁵ Per shi to ben' shajli'e che Chios, beena' chiyon ben' saaxyana' ben' li ben' shao', Chioza' ile'ile'ne' ben' li ben' shao' daa gonlilalleene', la'kzi bibi bene' kwenche idolee yel' goklen che Chioza'.

⁶ Dii Davina' bi'e dill' che yel' mbalaz che beena' na Chioza' nake' ben' li ben' shao' la'kzi bibi bene' kwenche bdolile'n.

⁷ Ki wna dii Davina':
Chakomba beena' ba biyakxen xtoleena',
na' ba biyol binit saaxya che'na'.

⁸ Chakomba beena' bi yizi' Xancho Chioza'ne' kwent.

⁹ ¿Achakile to ben'ka' yoozgake' sen' daa le circuncisión wak soagake' mbalaz? Bi nakan ka', san lekzka' ben'ka' bi yoo sen'na' wak soagake' mbalaz. La' ba wniakz' Chioza' wne' dii Abrahama' goke' ben' li ben' shao' lawe'na' daa wyajli'e che'.

¹⁰ Na' ¿batran wna Chioza' ka'? ¿Aba wyoo dii Abrahama' sen'na' kana' wna Chioza' nake' ben' li ben' shao'? ¿Awa bin' sho'en? Chioza' wne' ka' kana' bin' sho'en.

¹¹ Na'techlə wloo kwine' sen' daa le circuncisión na' sen'na' bli'n ba nake' ben' li ben' shao' lao Chioza' daa benlilalleene'. Daan, dii Abrahama'

nake' xoxzto' yog' beṅ' nak beṅ' li beṅ' shao' lao Chioza' daa nonlilall'gake'ne', la'kzi bi yoogake' senna'.

¹² Na' dii Abrahamama' lekzka' nake' xoxzto' neto' yoonto' seṅ daa le circuncióón. Per aga daa yoonto' seṅna'zan, san daa nonlilall'nto' Chioza', beena' ba nonlilall' dii Abrahamama' kana' zi' sho'e seṅna'.

¹³ Chioza' bchebe' gaki che dii Abrahamama' len xiin dia che'ka' doxen yell-lioni. Na' bchebe' wi'en legake' aga daa bengake' doxen ka na ley che dii Moisézan', san daa benlilall' dii Abrahamama' Chiozan', wna Chioza' nake' beṅ' li beṅ' shao' lawe'na'.

¹⁴ La' shel' to beṅ'ka' chonz ka na leyan' gaki chegake' daa bcheb Chioza' wi'e dii Abrahamama', bibi zjanayin gonlilall'cho Chioza' na' aga bi zakii daa bchebe' gone', shel'ka'.

¹⁵ Leya' nsa'n yel' zak'zi' che beṅ'ka' bi chon ka nan. Per shi bibi ley de, aga bi de dii inan napgake' dol'.

¹⁶ Ka nak daa bcheb Chioza' gone' che dii Abrahamama', nakan to goklen daa chone' che nottez beṅ' nonlilalleene' kwenche yog'zə xiin dia che'ka' ikaagake' daa we' Chioza' legake'. Bi nakan che to beṅ'ka' chonz ka na leya', san lekzka' nakan che nottezə beṅ' chonlilall' Chioza' ka benlilall' dii Abrahamama' le'. La' dii Abrahamama' nake' xoxzto' yog'cho cho' nonlilall'chone'.

¹⁷ Ka na Cho'a Xtill' Chioza': “Ba nzoa' li kwenche gako' xaxna' beṅ' zan inleeb.” Na' Chioza', beena' benlilall' dii Abrahamama', nape' yel' wak yisbane' beṅ' wetka' na' wxə wsile' diika' bin' gak.

18 Kana' bich non dii Abrahama' lez soa xiine', wyajli'e daa goll Chioza'ne' na' bene' lez gak ka golle'ne'. Ka' gok biyake' xoxxto' ben' zan inleeb, kon ka goll Chioza'ne', chi'e: "Kan' shesh shan xiin dia cho'ka'."

19 Biga gokchoplallee che Chioza', la'kzi chakbe'ile' ba nake' ben' golə par soa xiine', la' ba zoa gakile' to guiyoa yizan. Na' ni bi gokchoplallee la'kzi gok dii Sárana' nool will.

20 Bi gokchoplallee, san zizikli benlilallee gak daa bcheb Chioza' gone' na' be'laweene'.

21 La' wnezile' kwaslol Chioza' nape' yel' wak kwenche gone' yog' diika' chchebe'.

22 Daan ble'i Chioza'ne' ben' li ben' shao' daa wyajli'e che'.

23 Na' daa nan "Chioza' ble'ile'ne' ben' li ben' shao'", aga che tozen' nan ka',

24 san lekzka' cho'en dill' checho cho' nonlilall'cho Chioza', beena' bisbane' Xancho Jesucristona' ladj ben' wetka', la' lenchon chle'i Chioza' ben' li ben' shao' daa nonlilall'chone'.

25 Bzani Chioza' Xancho Jesucristona' wite' ni che saaxya chechoka' na' bisbane'ne' ladj ben' wetka' kwenche biyakcho ben' li ben' shao' lawe'na'.

5

1 Chioza' ba biyone' cho' ben' li ben' shao' daa ba nonlilall'chone', na' ba bizoalenchone' wen daa wit Xancho Jesucristona' ni checho.

2 Na' daa ba nonlilall'cho Crístoná', Chioza' toshizi chonile' cho' wen na' chibaicho daa noncho lez lljazoalenchone'.

³ Na' aga to dgazan yibaicho, san lekzka' yibaicho yel' zak'zi'ka' chle'icho yell-lioni, daa nezicho chongakan ka soachehcho gonlilall'chone'.

⁴ Na' shi zoachehcho chonlilall'chone' shlak chllaglocho yel' zak'zi'ka', na' chli'n nakchacho lao Chioza'. Na' shi nakchacho lao Chioza' na' noncho lez lljazoalenchone'.

⁵ Na' ka nak daa noncho lez, bi te bi la ki gakan, la' Chioza' ba bliile' cho' yel' chaki che'na' daa ba nzoe' Espiritu Santo che'na' loo yichjall'do'choni.

⁶ Kana' ni nakcho ben' wen dii mal na' aga bi gok goncho kwenche bi kwiayi'cho, kana'yen' bid Crístona' wite' ni checho cho' nakcho ben' saaxya.

⁷ Aga ga zoa to ben' lii izanteyi kwine' guete' ni che to ben' nak ben' li ben' shao'. Kayaadia shi yiyaxji to ben' izani kwine' guete' lwaas to ben' wen.

⁸ San Chioza' bli'e ka chakile' cho' daa bzanile' Crístona' wite' ni checho kana' ni nakcho ben' saaxya.

⁹ Daa blalj xchen Crístona' wite' ni checho, ba biyon Chioza' cho' ben' li ben' shao' lawe'na'. Na' daa wite' ni checho, ¿alechlin ki yisle' cho' lao yel' zak'zi'na' kat' illin lla wchoglo Chioza' che yog'lol ben'?

¹⁰ Shi kana' chakzbanicho Chioza', bselee Xiine'na' wite' ni checho kwenche bizoalenchone' wen, ¿alechlin naa ba bisbane'ne' ladj ben' wetka' ki yisle' cho' daa ba zoalenchone' wen?

¹¹ Na' aga diika'z chibaicho, san lekzka' daa nombia'cho Chioza', la' ni che Xancho Jesucristonan' bizoalenchcho Chioza' wen.

¹² Ni che yel' widenag che toz benaan golj wxes saaxyana' yell-lioni, na' ni che saaxyana' wyoo yel'

wita'. Ka' gok wzolo chet yog' ben', la' yog'zə ben' chongake' dii mala'.

¹³ Kana' zi' we' Chioza' dii Moiséza' ley che'na', ba chonkzə ben' yell-lioni dii mala'. Per shi bibi ley de, aga bi de dii gawan xya chegake'.

¹⁴ La'kzi aga bi ley got' dii gawan xya chegake', yel' wita' wñabia'n lao yog'loł ben'ka' ben dii mala' wzololenzan dii Adánna' bllinten kana' wban dii Moiséza', la'kzi bi wdishjgake' cho'a xtil' Chioza' ka ben dii Adánna'. Ni che dii Adánna' wyoo yel' wita' yell-lioni, san Jesucrístona', beena' wloo Chioza' xnezin wselee kani'teyi, bxie' yel' mban zejli kani'.

¹⁵ Per ka nak dii mala' ben dii Adánna', bi gak wsaklebichon ka dii wenna' ben Chioza' checho, dii xen wal nlla'n. Daa bxinj bñen dii Adánna' yog'zə ben' chet, san daa bsel' Chioza' Jesucrístona' kwenche wite' ni checho, bene' to dii wen inleeb che yog' ben' gonlilalleene'.

¹⁶ Bi gak wsaklebicho daa ben dii Adánna' kon yel' goklen daa ben Chioza' checho. La' wchogbia' che yog'loł ben' guetgake' ni che toz dii mala' daa ben dii Adánna'; san yel' goklen che Chioza' daa chone' checho chiyone' cho' ben' li ben' shao' lawe'na', la'kzi nakcho ben' saaxya nleeb.

¹⁷ Shi yel' wita' wñabia'n daa bxinj bñen dii Adánna', ¿alechlin ki inabia' ben'ka' ba biyon Chioza' ben' li ben' shao' daa nake' ben' wen inleeb, ni che Jesucrístona', beena' be' to yel' mban kob chegake'?

¹⁸ Dii mala' ben dii Adánna' benan ka bchoglo Chioza' che yog' ben' guetgake', na' ka'kzə dii wenna' daa ben Jesucrístona' benan ka yog' ben'ka' gonlilall'gake'ne' yiyakgake' ben' li ben' shao' na' gat' yel' mban chegake' daa bi te cheyin.

19 Daa gok dii Adánna' widenag, wchoglo che yog' ben' nakgake' ben' saaxya, per daa gok Crístona' ben' wizoa dill', ben' zan yiyak ben' li ben' shao'.

20 Chioza' bi'e ley che'na' kwenche wyanch xtol' ben' yell-lioni daa bi bzenaggake' cheyin. Per la'kzi wyanch xtoleeka', Chioza' bli'che' yel' chiyesh'lallii che'na'.

21 Na' daa chet yog' ben', chli'n saaxyana' napan yel' wak wsi wchogan cho'. Per lekzka' yel' chiyesh'lallii che Chioza' chli'n napan yel' wak yiyonan cho' ben' li ben' shao' na' gonan yel' mban checho zejli kaní ni che Jesucrístona', beena' nak Xancho.

6

1 ¿Beran inacho naa, lla? ¿Agonchcho saaxyana' kwenche wli'ch Chioza' yel' chiyesh'lallii che'na'?

2 ¿Aga kan' goncho! La' cho' ba nakcho ka ben' ba wit lao saaxyana' daa bich chñabi'an cho'. Daan, bich chiya! gonchon txen.

3 ¿Abi nezile ka wchoacho nisa' daa nakcho Cristo Jesús'a' txen, lekzka' zejin witlenchonen'?

4 Daa wchoacho nisa' zejin witlenchone' na' bgash'lenchone' kwenche gat' to yel' mban kob checho ka gok che Crístona' kana' bisban Xacho Chioza' le' kon yel' wak xen che'na'.

5 Na' daa ba witlenchone', ka'kzan yibancho ka bibane' ladj ben' wetka'.

6 Nezicho yel' mbanna' nsa'cho kana', wlliayi'n ka wit Crístona' lee yag cruza' kwenche bich we'cho cho'a xbayi beli chenna' na' bich inabia' dii mala' cho'.

⁷ ʔa' kat' to beṅ' ba wite', bich chṅabia' dii mala' le'.

⁸ Na' shi ba witlencho Crístona', ba nxenlall'cho lekzka' ibanlenchone'.

⁹ Neꞑicho biban Crístona' ladj beṅ' wetka' na' bich guete' dii yoblə, la' bich so saki yeḷ' wita' le'.

¹⁰ Na' ka wit Crístona', shlin shlaꞑjzan bsol bṅite' yeḷ' wak che saaxyana'. Na' daa mbane' ṅaa, zoe' chone' ka cheeni Chioza'.

¹¹ Na' ka'kzə le', chiyal' gakbe'ile ba nakle ka beṅ' ba wit lao saaxyana' daa bich chṅabia'n le', per mbanle lao Chioza' na' zoale chonle ka cheenile' daa nakle Xancho Cristo Jesús'a txen.

¹² Daan bi chiyal' we'le latj inabia' dii mala' le' kwenche we'zle cho'a xbayi beli chen chelena' daa ile'i yeḷ' wita'.

¹³ Bi chiyal' gon kwerp chelena' lall' na' saaxyana' kwenche gonle dii mala', san chiyal' gon kwinle do ka nakle lall' na' Chioza' kwenche gonle ka cheenile'. ʔa' wak inacho Chioza' ba bisbane' le' ladj beṅ' wetka' daa ba bene' le' to yeḷ' mban kob.

¹⁴ Bich chiyal' inabia' dii mala' le', la' bich zoale xṅi'a leya', san daa biyesh'lallii Chioza' le', ba zoalenle yeḷ' goklen che'na'.

¹⁵ ¿Nakrazə, ɭla? ʔaa ba biyesh'lallii Chioza' cho', na' bich zoacho xṅi'a leya', ¿agonchcho dii mala'? ꞑBi chiyal' goncho ka'!

¹⁶ Nezkzile shi ba ben kwincho lo na' beṅ' kwenche goncho bittez daa ne', choe'cho latj chṅabi'e chon'. Ka'kzan, shi chzenagcho che dii mala', na' inabia'n cho' na' wlliyi'n cho'. Na' shi we'cho latj inabia' Chioza' cho', wiyone' cho' beṅ' li

ben' shao'.

17 Per choxken Chioza', la'kzi kana' wñabia' dii mala' le' na' benle ka nan, naa do yichj do lall'le ba chzoale xtilleena' daa bli' bsedgakile' le'.

18 Naa ba biyell bila'le lao dii mala', na' ba biyakle lall' na' Chioza' kwenche gonle ka cheenile'.

19 Ba bi'a dill' che daa chak checho cho' benech kwenche shajniile dga nia' le'. Kana' ben kwınle lall' na' saaxyana' len dii zbanka' cheeni beli chen chelena' kwenche benle dii malka'. Na' naa, li gon kwınle lall' na' Chioza' kwenche soale gonle ka cheenile'.

20 Shlak be'le latj wñabia' dii mala' le', aga bzenagle che Chioza' na' bi benle ka cheenile'.

21 Na' aga bi banez wxi'le che dii mala' benle na' naa chiyii chido'lenile'n, la' yel' wıchokzan nsa'n.

22 San naa ba bisell bila' Chioza' le' lo ni'a na' dii mala' na' ba chonle ka cheenile', de banez cheyin daa zejch chonle daa nak wen, na' gat' yel' mban chele zejli kañi.

23 Laxj beena' chon saaxyana' nakan yel' wit, san daa chzani Chioza' wi'e beena' gonlilallee Xancho Cristo Jesúza' nakan to yel' mban zejli kañi.

7

1 Le' ben' bish' na' le' ben' zan', nombia'le leya' na' nezile leya' chñabi'an ben' shlak mbane'.

2 Na' ka nak leya', cho'en dill' nan noola' nshagna' chiyal' soalene' ben' che'na' shlak mbane', per shi guet ben' che'na', wak yikee ben' yoblə.

³ Shi lljsoalene' beṇ' yoblə shlak ni mban beṇ' che'na', nakan xya. Per shi ba wit beṇ' che'na', leya' nan wak yikee beṇ' yoblə, na' bi nakan xya.

⁴ Na' ka'kzan chele le', nakcho txen nonlilall'cho Crístona', le' beṇ' bish'dawaa na' le' beṇ' zandawaa. Daa nonlilall'le Crístona', beena' wit ni checho, zejín lekzka' ba nakle ka beṇ' ba wit lao leya' na' bich chṇabi'an le'. Na' ṇaa ba biyakle lall' na' beṇ' yoblə, beena' wite' na' bibane' ladj beṇ' wetka', kwenche goncho ka cheeni Chioza'.

⁵ Kana' wzoacho be'cho cho'a xbayi beli chenna', leya' wloochan ltip beli chen chechoka' na' benchcho dii mala', na' saaxyana' daa bencho bsa'n yel' wit.

⁶ Per ṇaa, ba nakcho ka beṇ' ba wit lao leya' daa btakw bchejan cho', na' ba biyell bila'cho kwenche goncho ka cheeni Chioza' daa ba bikob Espíritu Sántona' yichjlall'do'choni, na' bich chṇabia' leya' cho'.

⁷ Bi chiya! inacho leya' nakan dii mal. La' lennan' bzajniin nad' nan malan' chon'. Aga ṇezid' shi nakan mal selallaa bi de che beṇ' shel'ka' ki leya' nan: “Bi selalloo bi de che beṇ'.”

⁸ Per dii mala' yoo loo yichjlall'dawaani bchinan dga bllia Chioza' bia' kwenche wloochan ltip beli chen cha'ni na' chiya dii wzelallaa. La' shel' bibi leya' got', bibi de daa inan nakcho beṇ' wixinj wilen, shel'ka'.

⁹ Kana' bin' inezid' daa na leya', gokid' le wen nsa' cha', per ka wṇezid' daa nllia leya' bia', zizikli benz' dii mala' daa wlliyi' nad'.

¹⁰ Daa bllia Chioza' bia' goncho kwenche gakle-nan cho' gat' yel' mban checho, bhoglolan cha'

nan chiyal' guet'.

¹¹ La' dii mala' yoo loo yichjlall'dawaani bchinan leya' na' wxiye'n nad' kwenche blliyi'n nad'.

¹² Leya' dii licha nakan che Chioza', na' yog' daa nllian bia' nakan dii wna Chioza', nakan dii li dii shao' na' dii wen.

¹³ Leya' nakan wen na' aga lennan' benan ka kwiayaa. San dii mala' yoo loo yichjlall'dawa'nin bchinan leya' daa nak dii wen kwenche blliyi'n nad'. Na' daa nakan ka', ni che leya' bli'lao saaxyana' nakan dii mal inleeb.

¹⁴ Nezicho leya' nakan che Chioza', san nad', lega ben' de beli chen chon', na' chnabia' dii mala' nad' daa chon' ka nan.

¹⁵ Bi chajniid' ka chon', la' bi chon' dii wenna' daa cheenid' gon', san dii mala' daa chakzbanid', lelan chonz'.

¹⁶ Na' kat' chon' daa bi cheenid' gon', chakbe'id' leya' nakan wen.

¹⁷ Na' aga inacho nadaan chon' ka', san dii mala' daa daa yoo loo yichjlall'dawaanin chlligaan nad' kwenche chon' dii mala'.

¹⁸ Nad' nezid' aga bi dii wen cheeni beli chenni gonan. Na' la'kzi le llialallaa gon' dii wenna', bi chak gona'n.

¹⁹ Bi chizoid' gon' dii wenna' daa cheenid' gon', san dii mala' daa bi cheenid' gon', lelan chonz'.

²⁰ Na' daa chon' daa bi cheenid' gon', zej'in aga nadaan chona'n, san dii mala' daa chnabia' loo yichjlall'dawaanin chonan daa.

²¹ Chakbe'yenid' la'kzi cheenid' gon' daa nak wen, dii malalə chon'.

22 La'kzi chibayi loo yichjlall'dawaani ley che Chioza',

23 chakbe'id' de daa chsej chllonan gon' daa nezid' nak wen, la' dii mala' daa chnabia' nad' chtakw chchejan nad' kwenche gon' daa bi nak wen.

24 Le nyesh' chak cha! ¿Notgui yisell yila' nad' lao beli chenni dga ba nchogbia' kwiayi'?

25 Cho'a Chioza' yel' choxken daa wit Xancho Jesucristona' na' bisle' nad' lo na' dii mala'. Na' kin chajniida'n: chibaid' gon' ka na ley che Chioza', per beli chen cha'ni chlligaan nad' kwenche gon' dii mala'.

8

1 Na' naa, bich bi yel' zak'zi' che Chioza' yen ile'i ben'ka' nak Cristo Jesús'a' txen, ben'ka' bich chongake' ka na beli chen che'ka', san ba chongake' ka cheeni Espíritu che Chioza'.

2 La' daa nonlilall'cho Cristo Jesús'a', Espíritu che Chioza' ba bene' yel' mban kob checho, na' daa chnabia' Espírituna' cho', bich chnabia' saaxyana' cho' daa nsa' yel' wita'.

3 Ley daa bzej dii Moiséza' bi gok yislan cho' lao saaxyana' daa choncho ka na beli chenna'. Daan Chioza' bselee Xiine'na' goke' ben' de beli chen ka cho' per bi goke' ben' saaxya, na' wdixje' saaxya chechoka' ka wite' kwenche bich inabia'n cho'.

4 Chioza' bselee Crístona' ni checho kwenche so sakicho goncho wen lawe'na' ka na ley che'na'. Na' bich soacho goncho ka cheeni beli chenna' san soacho goncho ka cheeni Espíritu che Chioza'.

5 Ben'ka' ni chzenag che dii mala' yoo loo yichjlall'do'eka', toz len zegake' wneyi chongake';

san beṅ'ka' chzenag che Espíritu che Chioza', zegake' wṅeyi gongake' daa cheenile'.

⁶ Beṅ'ka' yoo yichjgake' gongake' dii mala', kwiayi'gake'; san beṅ'ka' yoo yichjgake' gongake' ka na Espíritu che Chioza', gat' yel' mban chegake' zejli kaṅi na' soagake' mbalaz.

⁷ Beṅ'ka' chibayi chon dii mala', chakzbangakile' Chioza', la' bi chzenaggake' ka na ley che'na', ni bi chak gongake' ka nan.

⁸ Beṅ'ka' ni chibayi chon dii mala', Chioza' bi chazlallee ka chongake'.

⁹ Per le', bich chzenagle che dii mala' san chzenagle che Espíritu che Chioza', shi ba zoe' loo yichjlall'do'lena'. Na' shi no bi zoa Espíritu che Crístona' loo yichjlall'do'ena', bi nake' lall' na' Crístona'.

¹⁰ La'kzi ba nakan guet kwerp che'lena' daa nakle beṅ' saaxya, per shi nakle Crístona' toz, Espíritu che'na' zoe' loo yichjlall'do'lena' na' dekzə yel' mban kob chele daa ba biyakle beṅ' li beṅ' shao' lao Chioza'.

¹¹ Na' shi Espíritu che Chioza', beena' bisbane' Jesús'a ladj beṅ' wetka', zoe' loo yichjlall'do'lena', Chioza' lekzka' gone' to yel' mban kob che kwerp che'lena' daa guet, daa zoa Espíritu che'na' loo yichjlall'do'lena'.

¹² Daan, le' beṅ' bish' na' le' beṅ' zan', chonan byen goncho ka cheeni Chioza' na' bi goncho kon daa nazan che beli chenni.

¹³ La' shi we'chcho cho'a xbayi beli chenni, na' guetcho; san shi we'cho latj gaklen Espíritu che Chioza' cho' kwenche kwej yichjcho dii mala' daa nan goncho, na' gat' yel' mban checho zejli kaṅi.

14 Yog' ben'ka' chzenaggake' che Espíritu che Chioza' na' chongake' ka cheenile', legaken' nakgake' xiin Chios.

15 Cho' ba zoa Espíritu che Chioza' loo yichjall'do'choni, bich chak checho ka chak che beena' zoa ben' chnabi'ene' na' chall chllebe'ne', san daa zoa Espíritu che'na' loo yichjall'do'chonan', zejín ba wkaa Chioza' cho' ka xiine'. Na' daa zoalen Espírituna' chon', chak che'chone': "Xadawaa."

16 Na' Espíritu che'na' lekzka' chzajniile' cho' kwenche chnezicho nakcho xiin Chios.

17 Na' daa nakcho xiin Chioza', lekzka' wllin lla ikaalencho Crístona' daa gone', la' shi goncho banez yel' zak'zi'ka' ka diika' ben ble'i Crístona', na' gakhone' t xen sho'lenchone' balaan.

18 Na' ka nak yel' zak'zi'ka' chen chle'icho yell-lioni, aga wllinlebin ka balaan xenna' sho'lenchone'.

19 Na' yog' diika' bxe bsil Chioza' chbezgakan yob illin lla wli'lao ba nakcho xiin Chioza'.

20 La' yog' diika' bxe bsil Chioza' bich nakshao'gakan ka gokgakan dii nech. Na' aga legakannan' goklall'gakan gakhakan ka', la' Chiozan' bllie' bia' gakhakan ka', per lekzka' bene' kwenche chbezgakan yiyakshao'gakan.

21 La' wllin lla kat' yog' diika' bxe bsile' bich gakhakan dii kwiayi', san yiyakgakan mbalaz inleeb ka gakh checho, cho' nakcho xiine'.

22 Na' nezicho ax̄t naanlla yog' diika' bxe bsile' chakh gakhakin ka chakh che to nool chllagloe' sane' bi'do' che'na'.

23 Na' aga toz diika' ben Chiozan' chakh gakhakin

ka', ka'kzan chak checho, cho' ba yoocho Espiritu che'na', beena' chon ka noncho lez gonch Chioza' dii wen checho, chbellyesh'cho shlak chbezcho yiyone' kwerp chechoni to dii kob na' wli'lao ba none' cho' xiine'.

²⁴ Kon ka bisla Chioza' cho' lo ni'a na' dii mala', noncho lez yikobe' kwerp chechoki. Aga daa ba den noncho lez, la' daa ba gok bich nakan dii goncho lez.

²⁵ Per shi ni noncho lez ile'icho daa zi' gak, chiyal' gapcho yei' chxenlall' shlak ni chbezcho gakan.

²⁶ Na' lezkka' Espiritu che Chioza' chaklene' cho' choncho daa bi chak goncho. La' aga nezicho nakan chiyal'yen' we'lwillcho Chioza', per kwin Espiritu che'na' chbellyeshee chnabe' checho lawe'na'. Na' la'kzi aga bi dill' chchine',

²⁷ Chioza', beena' nombi'e yichjall'do' yog'cho, nezile' bin chnab Espiritu che'na' checho. La' daa chaklall' Chiozan' chnabe' checho, cho' nakcho lall' nee.

²⁸ Na' nezicho Chioza' chchine' yog' diika' chen chle'icho kwenche gaklengakan cho', cho' ba chakichone', cho' ba wleje' kwenche gakcho lall' nee kon ka goklallee.

²⁹ Kana' bin' soatecho, Chioza' ble'shiile' cho' na' wleje' cho' kwenche yiyone' cho' ben' wen ka nak Xiine' Jesucristona', kwenche Jesucristona' gake' ben' lialo ladjchoni, cho' nakcho ben' bishee na' ben' zane'.

³⁰ Chioza' wleje' cho' kani'teyi, na' lezkka' gox wnabe' cho' kwenche gokcho lall' nee, na' biyone' cho' ben' li ben' shao' lawe'na'. Na' cho' ba biyone'

ben' li ben' shao', ba nakan sho'cho to balaan xen.

³¹ ¿Bera dech inacho cheyi dga ba ben Chioza' checho, lla? La' shi Chioza' zoalene' cho', ¿nora gak bi goni cho'?

³² Shi Chioza' axt ni Xiine'na' bi biyeshile' san bzanile'ne' wite' ni checho, ¿alechlin ki gone' cho' yog'lol diika' bchebe'?

³³ Aga no gak gao xya checho lao Chioza', la' len' ba wleje' cho' na' biyone' cho' ben' li ben' shao'.

³⁴ Na' aga no gak wchoglo checho guetcho. La' Cristo Jesúza' wite' ni checho, na' bibantie' ladj ben' wetka'. Na' chi'e kwit de shli che Chioza', chnabe' gaklene' cho'.

³⁵ Aga bi de dii gonan ka bich gaki Crístona' cho'. Ni yel' zi' daa chen chle'icho, ni dii lalljka' chak checho, ni daa chsak'zi' ben' cho', ni daa chbil chdoncho, ni daa bi de xalaancho, ni daa zoacho dii nxoll, wa shi wit ben' cho'.

³⁶ Chak ka na Cho'a Xtill' Chioza' daa na: Daa chzoanto' xtilloona' toshiizi de dii nxoll chento' witgake' neto'.

Chongakile' neto' ka xil'do'ka', baka' nzoagake' witgake'.

³⁷ Per Crístona', beena' chakile' cho', chaklene' cho' kwenche goncho gan lao yog'lolte diika' chen chle'icho.

³⁸ Na' daan nezid' aga bi de dii gonan ka bich gaki Chioza' cho': ni yel' wita', ni yel' mbanna', ni anjlka', ni dii xiw'ka', ni daa chak naa, ni daa zi' gaka,

³⁹ ni dii chak gana' zeelo nak sib wal, ni dii chak gana' zeelo nak zitj wal, ni bittez dii yoblə dii bxe bsil Chioza' bi gak gonan ka bich gakile' cho', la' ba

bli'e le chakile' cho' daa wit Xancho Cristo Jesús'a ni checho.

9

¹ Daa nonlilallaa Crístona' cho'a dill' li, na' bi chziyaa. Na' lekzka' Espíritu Sántona' chzajniile' nad' kwenche nezi yichjlall'dawaani dga nia' nakan dii li.

² Le nyesh' zoa' na' toshiizi le chjeli lall'dawaani,

³ na' axt shel' wx'e'id' bich gaklen Crístona' nad' na' kwiayaa kwenche shicholə gaklenan ben' Israelka' ben'ka' nak ben' wlall cha' na' ben' bishaa.

⁴ Chioza' wleje' dii xozxto'nto'ka' kwenche noni xiine' neto'. Na' got' to balaan chegake' daa wzoalene' legake'. Bchebe' gакgake' yell che', na' bi'e legake' ley che'na'. Na' bzajniile' legake' ka chiyal' we'la'ogake'ne', na' dii zan dii bchebe' gone' chegake'.

⁵ Neto' ben' Israel naknto' dia che dii Abraham'a, dii Isaaca' na' dii Jacoba', na' Crístona' lekzka' golje' lo dia chento'na' ka bide' yell-lioni. Na' chiyal' we'la'ochone' zejli kani, la' len' nake' Chios na' chnabi'e lao yog'lolte dii de. Kan' nakan.

⁶ Na' bi inacho Chioza' bi bene' ka bchebe' gone' chento', san daa gok, aga yog' ben'ka' golj lo dia che dii Israela' nakgake' dowlj ben' Israel.

⁷ Aga yog' ben' goljgake' lo dia che dii Abraham'a nakgake' dowlj xiin dia che'. Chioza' golle'ne': "Xiino' Isaaki gакb' xaxna' yog'lol xiin dia cho'ka' zi' zaak."

⁸ Dga chzajniin cho' nan aga ni che nakgake' xiin dia che dii Abraham'a nakgake' xiin Chios, san

ben'ka' chajle' gone' ka bchebe' gone', legaken' noni xiine'.

⁹ Ki nak daa bcheb Chioza' gone' che dii Abrahamama', chi'e: "Zi twiz ka naa zaa dii yoblə, na' Sárana' sane' to xiino' bi' byo."

¹⁰ Na' aga dgazan. Lekzka' Rebécana' wxane' chop bi'do' che dii xoxzto'nto' Isaaca'.

¹¹⁻¹² Na' kana' zi' galj bi' kweshka', na' ni bin' gongakb' dii wen ni dii mal, Chioza' bshaljlene' Rebécana', golle'ne': "Bi'na' galjə nech wlexj yichjb' lao bi'na' galjə koll'baa." Golle'ne' ka' kwenche chakbe'icho Chioza' chbeje' beena' gak xiine' kon ka ba blлие' bia' gak, na' chaxe' ben'ka' cheenile' gak xiine', ni bi chone' kwent shi bi ba bengake'.

¹³ Nakan kon ka na Cho'a Xtill' Chioza' daa na: "Gokid' Jacoba', na' bwiyyid' Esaúna'."

¹⁴ ¿Bera ka inacho, naa? ¿Awak inacho Chioza' bi chone' wen? ¿Bi nakan ka'!

¹⁵ La' Chioza' golle' dii Moiséza': "Beena' cheenid' yiyesh'lallid' na' yiyesh'lallidee, na' beena' cheenid' gaklen' na' gaklenee."

¹⁶ Daan, nezicho aga daa le cheeni ben' gake' xiin Chiozan' kwej Chioza'ne', ni aga ni che bi dii chone'n, san Chioza' chbeje'ne' daa chiyesh'lallile'ne'.

¹⁷ La' Cho'a Xtill' Chioza' cho'en dill' ka golle' faraónna', beena' wñabia' Egíptona': "Bzoa' li' chñabi'o kwenche gon' ka ile'i ben' yei' wak cha'na' na' kwenche gakbe'i yog' ben' lle' doxen yell-lioni nad' nak' Chios."

¹⁸ Na' kan' nakan, Chioza' chiyesh'lallile' ben'ka' cheenile' yiyesh'lallile', na' lekzka' chone' chech

yichjlall'do' ben'ka' cheenile' gакgake' ben' wide-nag.

¹⁹ Na' wnaljo': "Shi choncho kon ka ba nlia Chioza' bia' goncho, bi gак ine' napcho dol' lawe'na', la' aga wakə wsej wlloncho gак ka cheenile'."

²⁰ Na' shi ka' chakilo', ζnora nako' wsheshlenzo' Chioza'? Aga wak ine' to yes' yo yeen beena' benan: "ζBiche benzo' nad' ki?"

²¹ La' beena' chon yes' xwagka' wakə gone' benja' kon nak cheenile', na' wakte gone'n to yes' dii gon llin ga lliarote, na' sto dii wchine' che bittez.

²² Na' ka'kzə ba ben Chioza'. Ni che dii mala' chon ben' yell-lioni goklallee wliile' legake' yel' chllaa che'na' na' gone' ka wli'lao yel' wak che'na', per wzoile' wdape' yel' chxenlall' che ben'ka' chidol' yel' zak'zi'na', ben'ka' ba nakan kwiayi'.

²³ Na' lekzka', ba bli'e ka liizelozu ben' wen inlleb nake' daa ba biyesh'lallile' cho' na' bizi'xene' checho, na' biyone' cho' ben' li ben' shao' kwenche idol'cho balaan ka yillincho lawe'na'.

²⁴ Na' ba gox wṇab Chioza' cho', aga balz neto' naknto' ben' Israelan', san len bal-le bi nakle ben' Israel.

²⁵ Chak ka wna Chioza' daa bzej dii Oseaza', daa na: Ben'ka' bi nak yell cha', yepgakee: "Nakle yell cha'."

Na' ben'ka' bi gokid', yepgakee: "Chakid' le'."

²⁶ Na' latja' gana' golle' legake' bi nakgake' yell che', wsi' ben' legake' xiin Chios yaa Chios ban.

²⁷ Ki wna dii Isaiaza' che ben' Israelka': "La'kzi shesh shan ben' Israelka' axt gакgake' ben' zan

ka yox daa chi' cho'a nisdona', balchokzgaben' yilagake' kwenche bi kwiayi'gake'.

²⁸ La' Xancho Chioza' lobe' wchogbi'e ka gak che yog' ben' lle' yell-lioni."

²⁹ Ka bzej dii Isaíaza', kana' wne':

Shel' Xancho Chioza', beena' nak liizelozi ben' yel' wak choo yel' wak xen, bi bkwaane' sto chop dia chechoka',

ba biyol binitcho ka gok che ben' yell Sodómaka' na' ben' yell Gomórraka', shel'ka'.

³⁰ ¿Nakra inacho, naa lla? Ben'ka' bi nak ben' Israel bi wzegake' wneyi kwenche yiyakgake' ben' wen lao Chioza', per daa benlilall'gake'ne', ba biyakgake' ben' li ben' shao' lawe'na'.

³¹ San ben' Israelka', la'kzi goklall'gake' yiyakgake' ben' wen lao Chioza' daa zejlengake' ley che'na', bi wxakgakile'n.

³² Na' ¿biche bi biyakgake' ben' li ben' shao' lawe'na'? Daa bi benlilall'gake'nen'. Kon gokgakile' ina Chioza' nakgake' ben' li ben' shao' daa chongake' daa na leya'. Na'ch gok chegake' ka chak che ben' chjachew' yaj,

³³ yaja' daa chzetj Cho'a Xtill' Chioza', daa na:

Wselaa to ben' yell Siónna',

na' saklebile' ka to yaj daa chjachew' ben', na' ka to yaj dii ljsho'gake' na' ibixgake'.

Na' beena' wxenilalleene', biga yiyajile' daa nxenilalleene'.

10

¹ Na' le' ben' bish' na' le' ben' zan', daa lliallalaa na' daa chñab' kat' choe'lwill' Chioza' chñabidee

yisle' ben' wlall čha'ka', ben'ka' nak ben' Israel, kwenče bi kwiayi'gake'.

² Nez nle'id' čhegake' zechgagake' wneyi gongake' ka cheeni Chioza', toz daa bi nezgakile' nakyen'an cheenile' gongake'.

³ Daa bi čajni'gakile' toz Chiozan' chiyone' ben' ben' li ben' shao', chaklall'gake' yiyon kwingake' ben' wen, na' bi cheengakile' gonlilall'gake' Crístona' kwenče yiyakgake' ben' li ben' shao' lawe'na'.

⁴ La' daa bid Crístona', bene' daa bi gok gon leya', na' yog' ben'ka' gonlilall'gake'ne' yiyakgake' ben' li ben' shao' lao Chioza'. Na' bich goncho lez daa goncho ka na leyan' yiyakcho ben' wen lawe'na'.

⁵ Dii Moiséza' bzeje' ka chiyal' gon ben'ka' zoa xni'a leya' kwenče yiyakgake' ben' wen lao Chioza', na' nan: “Nottezə ben' chon doxen ka na leya' si'e banez yel' mban čhe'na'.”

⁶ Na' čhe ben'ka' nak ben' li ben' shao' lao Chioza' daa nonlilall'gake'ne', wne': “Bi sa'lall'zle, inale: ¿Nora gak shaj yabana'?”, (kwenče gone' ka yetj Crístona' yell-lioni).

⁷ “Ni bi inale: ¿Nora gak yetj gana' lle' ben' wetka'?”, (kwenče lljaleje' Crístona' ladje'ka').

⁸ Ki chizna daa bzej dii Moiséza': “Dillaa daa ba wna Chioza' zoalenan le' na' ba yoon cho'a loll'lena' na' loo yichjlall'do'lenna'", na' lennan' daa choe'lennto' le', nanto' chiyal' gonlilall'le Crístona'.

⁹ Shi wi'o dill' Jesúza' nake' Xancho na' shajli'o do yichj do lalloo nan Chioza' bisbane'ne' ladj ben' wetka', na' yisla Chioza' li' kwenče bi kwiayoo.

¹⁰ La' daa shajle'cho do yichj do lall'chon, yiyakcho ben' li ben' shao' lao Chioza', na' lekzka' daa

choe'cho dill' nan Crístona' nake' X̄ancho, yisle' cho' kwenche bi kwiayi'cho.

11 Cho'a Xtill' Chioza' nan: “Nottez ben' gonlilalleene', biga yiyajile' daa benlilalleene'.”

12 L̄aa nakcho ben' Israel, l̄aa bi nakcho ben' Israel, Crístona' nake' X̄ancho, na' chaklene' yog'cho cho' ch̄nabcho yel' goklen lawe'na'.

13 L̄a' nottezə ben' in̄abe' gaklen X̄ancho Crístona' le', na' yisle'ne' kwenche bi kwiayee.

14 Per ¿nakra gon ben' in̄abgake' gaklene' legake' shi bin' gonlilall'gake'ne'? Na' ¿nakra gongake' gonlilall'gake'ne' shi bin' yengakile' xtilleena'? Na' ¿nakra gak yengakile' xtilleena' shi kono zoa ch̄ixje'ile'n legake'?

15 Na' ¿nakra gak soa ben' ch̄ixjee xtilleena' shi kono wsel' legake'? Ka na Cho'a Xtill' Chioza': “Mbalaz inleeb kat' ila' ben'ka' zid̄tixje'gake' dill' wen dill' kob che Chioza'.”

16 Per aga yog' ben' Israelka' chzenaggake' dill' wen dill' kob che Chioza'. Chak ka bzej dii Isaíaza', gana' na: “X̄an', kono chajle' dillaa daa chyixje'nto'.”

17 Daan, kwenche gonlilall' ben' Crístona' chiyal' yengakile' xtilleena'.

18 Na' nia': ¿Abin' yengakile' cho'a xtilleenan', lla? ¿Yog'ze' ba bengakile'n! L̄a' cho'a xtill' Chioza' nan:

Cho'a xtilleeka' chllinan doxen yell-lioni
ax̄t gana' zeelo chiyoll chidon.

19 Na' chiznia', ¿anti neto' ben' Israelan bi wyajni-into'n, lla? Zajniinto'n. L̄a' dii Moiséza' wd̄ixji'e daa goll Chioza'ne' che ben' Israelka' kana' wne':

Nad' Chios gon' wen che ben'ka' bi nakgake' yell
 cha' kwenche gaklall'le gon' chele ka chon'
 chegake'.

Na' gon' kwenche illaale daa chon' wen che ben'
 zit'ka' ben'ka' bi napgake' yel' chajni.

²⁰ Na'tech dii Isaíaza' biyaxjile' wne':

Ben'ka' bi wze wneyi gombia'gake' nad', ben' ka
 bembia'gake' nad'.

Na' ben' kwenche ben'ka' bi wyoo yichjgake' nad'
 bembia'gake' nad'.

²¹ Na' dii Isaíaza' lekzka' wdixji'e daa goll Chioza'ne'
 che ben' Israelka' kana' wne': "Toshiizi goklal-
 laa gaklen ben' widenagka', ben'ka' bi chzoa xtil-
 laana'."

11

¹ Na' nia' ¿aba wlej yichj Chioza' yell che'na'
 toshiizin, lla? ¿Bi nakan ka! La' lekzka' nad' nak'
 ben' Israel. Golj' lo dia che dii Abrahama' na' nak'
 xiin dia che dii Benjamínna'.

² Kani'teyi wlej Chioza' neto' ben' Israel
 kwenche naknto' yell che', na' aga ba wlej yichje'
 neto'. ¿Abi chjtinile ka na Cho'a Xtill' Chioza' che
 Elíaza'? nan ka be'lwille' Chioza' wdawe' xya che
 ben' Israelka', chi'e:

³ "Xan', ben' wlall cha'ka' ba betgake' ben'ka'
 wdixjee daa gollo' legake' na' ba blliyi'gake' gana'
 chzeynto' bayix'ka' chonnto' li'. Stochga nad'
 chgaana', na' lekzka' cheengakile' witgake' nad'."

⁴ Na'ch Chioza' golle'ne': "Ni nzoa' galla mil ben'
 Israel, ben' chzenag cha' na' bin' wchek' xibe'ka'
 lao Baala'."

5 Na' ka'kzan chak naanlla, zi xonjchga neto' ben' Israel chzenagnto' che'. Na' yel' ben' wen che'na' wleje' neto' gaknto' lall' nee daa nake' ben' chiyesh'lallii.

6 Na' shi yel' ben' wen che'nan' wleje' neto', zevin aga wleje' neto' ni che shi bi dii wennan chonnto'. La' shel' wleje' neto' ni che dii wenna' chonnto', bi nakan to goklen daa bene' chento', shel'ka'.

7 Ben' Israelka' goklall'gake' yiyakgake' ben' wen lao Chioza' tobia'lall'zgake', na' bi gokan, san ben'ka' ba wlej Chiozan' bdol' bllongakile'n. Na' ben'ka' sto, zizikchli gokchgake' ben' widenag.

8 Gok ka na Cho'a Xtill' Chioza' daa na: “Chioza' bchol bnitile' legake' kwenche bi shajni'gakile'. Na' axt naanlla nakgake' ka to ben' bi chen chle'i.”

9 Ki wna dii Davina':
“Yiyakshga lni che'ka' ka to yalj dii wzapan legake', na' ka to dii chgoo chchew'gake', na' sak'zi'gake'.

10 Gakshgagake' ka ben' lchol;
na' toshiizi gak chegake' ka to ben' noa' to dii zii wal.”

11 Na'ch nia': ¿Aada bi bzenag ben' Israelka' che Chiozan' wchoonlallee legake' toshiizi, lla? ¿Bi nakan ka! San daa bi bzoagake' xtilleenan', na'chan bisle' ben'ka' bi nakla ben' Israel kwenche ben' Israelka' lekzka' galkall'gake' yisle' legake'.

12 Shi yel' widenag che ben' Israelkan' benan ka gok wen che ben'ka' bi nak ben' Israel, ¿alechlə ki gakch wen chegake' kat' ben' Israelka' yiy-onlilall'gake'ne'?

13 De to dii cheenid' we'len' le' dill', le' bi nakle ben' Israel. Chioza' ba wleje' nad' na' bselee nad'

laolena'. Na' do yichj do lallaa chon' dga bene' lall' na' gon',

¹⁴ kwenche shi bal ben' wlall cha'ka' gakkall'gake' gakk chegake' ka ba chwiagake' chak chele, na' yilagake' bi kwiayi'gake'.

¹⁵ La' shi daa bzoa Chioza' ben' Israelka' ka'lə, bene' ka ben'ka' bi nak ben' Israel bizoalengake'ne' wen, le mbalaz kat' illin lla yilebe' ben' Israelka' sto shii. La' gakk chegake' ka to ben' biban ladj ben' wetka'.

¹⁶ Na' shi lee kwana' chbejcho daa chonicho yetxtil necha' daa choe'cho Chioza', zevin doxente kwana' nakan che'. Na' shi lo yaga' nakan che Chioza', lezkka' xозиинка' nakgakan che'.

¹⁷ Ben' Israelka' zaklebgakile' yag olivo wenna' daa bchogue' bal xозиинка', na' le' bi nakle ben' Israel zakleBILE' yag olivo yixaa daa bidee lee yag wenna'. Na' yag wenna' noxaan xozii yag olivo yixaa diika' bidee le'inna' na' cho'en yel' mban chegakan.

¹⁸ Per bi gakile nakchle ben' wench aga ka ben' Israelka', ben'ka' zaklebi xoz' yaga' diika' bchogue'. Bi shep sha'lall'le, la' aga xoz' yagan' cho'en yel' mban cheyin san loinnan' choe'n yel' mban che xозиинка'.

¹⁹ Na' wnaljale: "Bchogue' xозиинка' kwenche bidee neto' le'inna'."

²⁰ Lekzile kan' nakan, la' daa bi benlilall'gake' Chiozan', bzo'e' legake' ka'lə, na' biyakle lall' nee daa nonlilall'lene'. Daan, bi shep sha'lall'le, san li gall illeb Chioza'.

²¹ La' shi Chioza' bi biyeshile' xoz' yaga' diika' nak dowlj, lezkka' gone' chele shi naa.

22 Li gake'bi ka beṅ' wen beṅ' shao' nak Chioza' na' lekzka' nake' beṅ' chsak'zi'. La' bsak'zi'e beṅ'ka' bi benlilall'gake'ne', na' ba chone' wen chele. Na' gonche' wen chele shi gonle ka dii le gonlilall'lene', san shi bich gonlilall'lene' lekzka' wzoe' le' ka'lə.

23 Na' shi beṅ' Israelka' gonlilall'gake'ne', na' yidee legake' sto shii lee yaga', la' Chioza' wak gone'n.

24 Na' le' bi nakle beṅ' Israel, wak inacho nakle ka xoz' yag olivo yixaa diika' bidee lee yag olivo wenna', la'kzi bi nakan dowlj xoziiin. ¿Alechlin diika' nak dowlj xoziiin ki yideen sto shii? Beṅ' Israelka' nakgake' ka xoziiin daa nak dowlj, na' aga bi lallj nakan yileb Chioza' legake' dii yoblə.

25 Le' beṅ' bish' na' le' beṅ' zan', de to dii bin' inezile daa bzajni Chioza' nad', na' cheenid' inezilen kwenche bi gakte beṅ' cha'sib na' gakte zak'chle ka neto' beṅ' Israel. La' aga toshiizin gakte beṅ' Israelka' beṅ' widenag, san kat'ka' ba bza' beṅ'ka' bi nak beṅ' Israel gonlilall'gake' Crístonan', bich gakte beṅ' Israelka' widenag.

26 Na' ka illin lla gakte ka', na'ch yog' beṅ' Israelka' yiyakgake' lall' na' Chioza'. Na' gakte ka na Cho'a Xtilleena' daa na:

Yell Jerusalénna' ichej to beṅ'

yisell yilee beṅ'ka' nak xiin dia che dii Jacoba' lao dii mala'.

27 Na' dgan chcheb' gon' chegake',

yizi'xen' saaxy ch'ka'.

28 Na' daa bi bzenag beṅ' Israelka' dill' wen dill' kob che Crístonan', bllaa Chioza' legake'. Na' daa gakte ka' got' latj benlilall'lene', le' bi nakle beṅ' Israel.

Per Chioza' ni chakile' neto' ben' Israel daa wleje' dii xozxto'nto'ka' kwenche gakgake' ben' yell che'.

²⁹ Na' daa choḅ Chioza', aga wikwase'n na' bi chiyajile' daa chax chḅabe' cho'.

³⁰ Kana', le' bi nakle ben' Israel, bi bzenagle che Chioza'. Per naa, daa gok ben' wlall cha'ka' ben' widenag lao Chioza', ba biyesh'lallile' le'.

³¹ Na' daa bi chzenaggake' che Chioza' naa, chak ka' kwenche wliyi Chioza' legake' nan lekzka' chiyesh'lallile' legake' ka chiyesh'lallile' le'.

³² La' Chioza' bi'e latj yog'lol ben' gokgake' ben' widenag kwenche yog'logake' yiyesh'lallile'.

³³ ¡Dii xen inleeb nak yel' sin' na' yel' chajni che Chioza'! ¡Ni to kono chajni daa nllie' bia' gak wa daa nllie' bia' gone'!

³⁴ La' “ni to kono nezi daa chza'lall' Xancho Chioza', na' ni to kono gak wzajniile'ne' nakan chiyal' gone'.

³⁵ Biga zoa ben' ba bi'e Chioza' dii naki che' kwenche gone' lez yigoo Chioza' wzon che'.”

³⁶ La' len' bxe bsile' yog'lolte dii de na' bllie' bia' chongakan ka chaklallee, na' yog'lol dii de nakan che'. ¡Le' chidolee koochone' balaan zejli kani! Kan' nakan.

12

¹ Na' le' ben' bish' na' le' ben' zan', daa ba biyesh'lallii Chioza' cho', chat'yoid' le', li we' Chioza' do ka nakle naa mbanle kwenche gagle dowalj ben' wen ka chazlallee, la' kan' chiyal' we'la'ochone'.

² Na' bi gonle txen diika' de lo yell-lioni, san li we' latj yikob Chioza' yichjlall'do'lena' kwenche yilla'

yel' mban chelena'. Na' ka' gakbe'ile daa cheenile' gonle. Na' daa cheenile' goncho nakan dowalj dii wen, daa chazlallee.

³ Daa nzoa Chioza' nad' gon' xshine'na', nia' le': Ni tole bi gakile ba nakle to ben' zakii. San li gakbe'i nak nakle lao Chioza' kon ka zej chaklene' le' chonlilall'lene'.

⁴ Ka nak che kwerp chechoni, dii zan dii nsa'n na' aga toz ka dii chongakan.

⁵ Ka'kzan cho', la'kzi nak zanchi, tozan nakcho daa nonlilall'cho Crístona', na' ndil nllagcho ka ndil nllag diika' nsa' to kwerp.

⁶ Chioza' ba bene' cho' wde wdeli daa gak goncho kon ka chazlallee gon to tocho. Daan, beena' naki che' chixje'ile' ben' daa che' Chioza'ne', chiya! wxenilalleene' gaklene' le' gone'n.

⁷ Na' beena' naki che' gaklene' ben', chiya! gone'n do yichj do lallee. Na' beena' naki che' wli' wsedile' ben' yoblə, chiya! wli' wsedile' legake'.

⁸ Na' beena' naki che' wtipe' lall' ben', chiya! wtipe' lall'gake'. Na' beena' naki che' izanile' bi wi'e ben', chiya! wi'en do yichj do lallee. Na' beena' naki che' gak kwee xnezi dii chak che ben', chiya! gone'n xochi ga zeelo gake'. Na' beena' naki che' yiyeshile' ben', chiya! yibaile' gaklene' ben'.

⁹ Li gaki ljwell-le do yichj do lall'le. Li gakzbani dii mala' na' li soa gonle dii wenna'.

¹⁰ Li gaki ljwell-le ka bish' goljle, na' ganga goni ljwell-le ka ben' zak'chi ka le'.

¹¹ Bi wshe'lall'le gonle daa cheeni Xanchona', san li gon ka dii le gonle daa chazlallee axt ga zeelo soile.

12 Li yiba yizaki daa nonle lez lljazoalenle Chioza', li gap yel' chxenlall' kat' zaak yel' zak'zi'ka', na' li we'lwill Chioza' toshiizi.

13 Le' nakle lall' na' Chioza', li gaklen ljwell-le shi bi dii chyalljile. Na' li we' ben' ga yigaangake' loo yoo lill-le.

14 Chiyal' inabile Chioza' gak wen che ben'ka' chsak'zi' le'. Li inab gak wen chegake' na' bi chishjle bia' blag' chegake'.

15 Li yiba yizakleni ben'ka' chiba chizaki na' li kwell-len ben'ka' chbell.

16 Li soalen ljwell-le wen. Bi gakte ben' cha'sib, san li gon txen ben' yesh'do'ka'. Na' bi gon kwinle ka to ben' sin'.

17 Shi ga zoa ben' chone' mal chele, bi yizi'le wzonna'. Chiyal' sho' yichjle gonle wen lao yog' ben'.

18 Chiyal' gonle axt ga zeelo gakte kwenche soalenle yog' ben' mbalaz.

19 Le' ben' bish' na' le' ben' zan', bi chiyal' yizi'le wzon che ben' shi bi chone' chele, san li gonan lo na' Chioza' kwenche le' wsak'zi'ene'. La' Cho'a Xtilleena' nan: "Xancho Chioza' ne': Nad' yizia' wzon che ben'ka' chon dii mala'. Na' nad' wsak'zi'gakee."

20 Na' lekzka' nan: "Shi chbil chdon beena' chakzbani li, be' dii yeej gawe'. Na' daa gono' ka', yiyii yido'ile'."

21 Bi we'le latj inabia' dii mala' le', san li gon wen kwenche gonle gan dii mala'.

13

¹Yog'cho chiyal' wzenagcho che ben'ka' chnabia',

la' aga bi yel' w_nabia' de dii bi nak che Chioza'. Na' Chioza' nzoe' be_n'ka' kwenche in_nabia'gake'.

² Na' beena' chizoshi' be_n'ka' ch_nabia', daa nllia Chioza' bia' gonchon chizoshi'e. Na' be_n'ka' chon ka', choglo chegake' sak'zi'gake'.

³ Be_n'ka' ch_nabia', aga zoagake' kwenche wwall wshebgake' be_n'ka' chon wenan, san be_n'ka' chon malan chiya_l' gall illebgake' legake'. Shi chall chllebo' be_n'ka' ch_nabia', ben wen, na' in_egake' wen cho'.

⁴ La' Chioza' nzoe' be_n'ka' ch_nabia' kwenche soa-cho mbalaz. Per shi bi chono' wen, na'chan sho' shebo', la' aga zoaxenzə be_n'ka' ch_nabia'n, san Chiozan' nzoe' legake' kwenche wsak'zi'gake' ka chiya_li beena' bi chon wen.

⁵ Daan, chonan byen wzenagcho che be_n'ka' ch_nabia', aga kwenchezə bi wsak'zi'gake' chon', san daa nezicho chiya_l' goncho wenan.

⁶ Na' lekzka' chiya_l' we'cho daa chidol'cho chixjcho, la' Chioza' nzoe' legake' kwenche ch_nabia'gake', na' lennan' noni xshingake'.

⁷ Na' chiya_l' yiyixjcho che yog' be_n' shi bi chbag'cho chegake'. Shi chal'cho daa chchixj be_n'ka' ch_nabia' cho', chiya_l' chixjchon. Na' beena' chiya_l' idap balaan, chiya_l' gapchone' balaan. Na' beena' chidol' sho'e balaan, chiya_l' koochone' balaan.

⁸ Bi chiya_l' ibag'cho che be_n', san daa chiya_l' goncho gaki ljwellcho, la' beena' ba chaki bish' ljwelle'na' ba chone' doxen ka na ley che Chioza'.

⁹ Na' ki na ley che'na': "Bi taleno' nool bi nak xoolo'. Bi gono' xya. Bi kwano'. Bi selaloo bi de che be_n'." Yog'kzə diikin ba choncho lente yog'

diika' sto nllia leya' bia' shi ba choncho dga na:
 “Chiyal' gaki bish' ljwello'na' ka chaki kwino'.”

¹⁰ Shi ba chakicho bish' ljwellchona', bibi dii mal gonichone'. Daan, ba choncho doxen ka nllia leya' bia' shi ba chaki ljwellcho.

¹¹ Li gakbe'i ka nak llaki zoacho naa. Ba gol' goncho ka dii le na' bich gonzcho ka ben' ches, la' gaoch ba zoa yisla Chioza' cho' lao dii mala' aga ka kana' zi' wyajle'cho cho'a xtilleena'.

¹² Ba zoa gao te che yell-lioni gani chnabia' dii mala' daa zaklebi yel cholā', na' ba zoa gao ile'icho beeni' che Chioza'. Daan, chiyal' kwej yichjcho dii mala' na' soacho goncho dii wenna' lega ben' yoo beeni' che Chioza'.

¹³ Chiyal' wsa' checho wen, ka ben' chda tella. Bi chiyal' goncho txen ga cheej chao ben' na' chzoll chnitgakile', ni bi chiyal' talencho xiin xool ben' wa xiin xyo ben', ni bi chiyal' goncho bichlā daa nak zban. Na' bi chiyal' gaktiil-lencho ben', ni bi chiyal' gakcho ben' xe'.

¹⁴ San chiyal' gon kwincho lall' na' Xancho Jesucristona' na' koo yichjcho wsa' checho ka chazlallee na' bich secho wneyi we'cho cho'a xbayi beli chenni.

14

¹ Li gap yel' chxenlall' che beena' bin' gakcha, na' bi gaktiil-lenlene' ni che diika' bi nak dii llialo.

² La' bal' ben' chakgakile' nakkzan wen gaogake' bittezə yel' wao, na' zi' bale' chakgakile' chiyal' gaogake' shgal' yix' kwan.

³ Beena' cheej chao bittezə, bi chiyal' gonile' nakzi beena' bi cheej chao yog'lol. Na' beena' bi

cheej chao yog'loł, bi chiyal' gakile' beena' cheej chao bittezə bi chone' wen. La' Chioza' ba noni xiine' choptegake'.

⁴ ¿Nora nako' li' wwia wyizo' nak chon wen llin che beŋ' yoblə? Toz xane'nan' nezile' shi chone' wen wa bi chone' wen. Na' wzakkzile' gone' ka chiyal', la' Xanchona' nape' yel' wak kwenche gone' ka soachech xiine'ka' gongake' ka cheenile'.

⁵ Na' nit' beŋ' chakgakile' zoa lla nakchan lla choo lla xench aga ka lla yoblə. Na' lekzka' zoa beŋ' chakgakile' toz ka nak yog'te llaka'. To to beŋ' chiyal' soe' do yichj do lallee gone' ka chakile' nakan wen.

⁶ Na' beena' chaki zoa lla nakan lla choo lla xench aga ka lla yoblə, chbeje'n kwenche kwee Xancho Crístona' balaan. Na' beena' chaki toz ka nak yog'te llaka', lekzka' Xancho Crístonan' chgwee balaan daa chakile' ka'. Na' beena' chao bittezə, chgwee Xanchona' balaan, la' cho'e Chioza' yel' choxken kat' chawe'n. Na' beena' bi chao yog'loł, lekzka' chgwee Xancho Crístona' balaan, la' lekzka' cho'e Chioza' yel' choxken kat' chawe'.

⁷ Ni tocho bi chiyal' secho wneyi che kwinzcho. Shi mbancho wa shi guetcho chiyal' secho wneyi daa cheeni Crístona'.

⁸ Shi mbancho na' goncho ka sho' Xancho Jesucrístona' balaan, na' shi guetcho na' guetcho ka sho'e balaan. La', laa mbancho wa ba witcho, lall' na' Xanchona'kzan nakcho.

⁹ Crístona' wite' na' bibane' ladj beŋ' wetka' kwenche gake' Xan yog'loł beŋ', ka beŋ' mban na' ka beŋ' ba wit.

¹⁰ Bi chiyal' yiya yiyiljcho bish' ljwellchona', ni bi chiyal' gonichone' nakzi. La' yog'lołcho lljazecho

lao Chioza' kwenche wchogloe' che to tocho.

11 Cho'a Xtill' Chioza' nan:

Xancho Chioza' ne', dii li zoakz' nad', na' dii li yog'
ben' wchek' xibe'ka' lawa'ni,

na' yoguee we'gake' dill' nan nad' nak' Chios.

12 Na'chan to tocho yidecho kwent lao Chioza' che
diika' bencho.

13 Daan, bich chiya! yiya yiyilj ljwellcho. San
wsak'cho bi goncho bittezə dii gonan ka ixop bish'
ljwellchona' gone' dii mala' wa gakchoplallee.

14 Daa bzajni Xancho Jesúsza' nad', nezid' aga
bi yel' wao de dii chxinj chlenan cho', lete shi
to ben' chakile' de yel' wao dii chxinj chlenan
yichjlall'do'ena', bi nakan wen gawe'n shi naa.

15 Na' shi daa cheej chawo' chonan ka
chakchoplall' bish' ljwello'na', aga chakilo'nen'
shi ni cheej chaozo'n. Bi chiya! yeej gawo' daa
gonan ka kwiayi' beena' wit Crístona' ni che'.

16 La'kzi chonle bittezə dii chakile nakan wen, bi
chiya! gonchlen shi chonan ka ina ben' yoblə aga
wenan chonle.

17 La' shi ba chnabia' Chioza' cho', diika' cheej
chaocho bi nakan dii llialo, san dii llialo yiyakcho
ben' li ben' shao' na' soalen ljwellcho mbalaz, na'
soacho yiba yizakicho daa zoalen Espíritu Sántona'
cho'.

18 Na' shi zoacho choncho diiki chazlall'
Crístona', na' yibayi Chioza' ka choncho na' lekzka'
ben' yell-lioni inagake' choncho wen.

19 Daan, chiya! goncho to dii byen soalen ljwell-
cho mbalaz na' gakchachcho ganga.

20 Bi yeej gaocho to dii gonan ka yinit dii wenna'
ba ben Chioza' checho. Dii li, yog' diika' cheej

chaocho nakgakan wen, san bi nakan wen yeej gaocho to dii chonan ka gakchoplall' ben' yoblə.

²¹ Wentelan bi gaocho belaa ni bi yeejcho vinona', ni bi gonzcho bittezə dii gonan ka gakchoplall' bish' ljwellchoka'.

²² Chiyal' inezilo' daa yeej gawo' do yichj do lalloo bi nakan mal lao Chioza'. Chakomba beena' bibi chza'lallee cheyi daa nezile' nak wen.

²³ Beena' chonchoplall' kat' yeej gawe' to yel' wao, chape' dol' daa bi chawe'n do yichj do lallee. Na' yog' daa bi goncho do yichj do lall'cho, nakan xya.

15

¹ Na' cho' ba zoachechcho chonlilall'cho Chioza', chiyal' gapcho yel' chxenlall' che ben'ka' bin' gakcha, na' bi chiyal' gonzcho daa cheenzicho goncho.

² To tocho chiyal' goncho dii gaklenan bish' ljwellchoka' kwenche gakchagake'.

³ La' Crístona' aga bene' daa wyazlall' to kwinze', san gok che'ka na Cho'a Xtill' Chioza', daa na: “Daa wchell wne ben' cho' bzoazi'yaagakan nad'.”

⁴ Na' yog' diika' na Cho'a Xtill' Chioza' bzejgake'n kwenche wzajniin cho' na' wtipan lall'cho kwenche gapcho yel' chxenlall' lao diika' chen chle'icho na' goncho lez dii wenna' ba bcheb Chioza' checho.

⁵ Chioza', beena' chon cho' yel' chxenlall' na' chtipe' lall'cho, gaklenshgue' le' soalen ljwell-le wen kon ka bli'yi Cristo Jesús'a cho',

⁶ kwenche yog'le gake toz we'la'ole Chioza', beena' nak Xa Xancho Jesucríston'a'.

7 Daan, li wleb ljwell-le, ka ben Crístona' blebe' le' bénlene' txen, kwenche koole Chioza' balaan.

8 Na' nia' le', Crístona' bide' kwenche gaklene' neto' ben' Israel, kon ka bcheb Chioza' lao dii xoxto'nto'ka' kwenche inezinto' chone' kon ka chchebe'.

9 Na' lezkza' bide' kwenche ben'ka' bi nak ben' Israel we'la'ogake'ne' daa chiyesh'lallile' legake'. Chak ka na Cho'a Xtill' Chioza' daa na: Daan, we'lawaa li' ladj ben'ka' bi nak ben' Israel, na' gol' inia' we'lawaa li'.

10 Na' gan yoblə chiznan:

Le' bi nakle ben' Israel, li yibaleni neto' naknto' yell che'.

11 Na' lezkza' gan yoblə chiznan:

Yog'le le' bi nakle ben' Israel, li we'la'o Xancho Chioza'.

Le' lle'le yog'te yell, li gol' inie'.

12 Na' lezkza' dii Isaíaza' bzeje' daa na:

Ka to yag dii chigaa, ka' yiyak xiin dia che dii Isaína',

daa galj to ben' inabi'e ben'ka' bi nak ben' Israel, na' gongake' lez gaklene' legake'.

13 Chios, beena' noncho lez gone' wen checho, gonshgue' ka yibaile na' soale mbalaz daa nonlilall'lene, kwenche zizikli gonchlene' lez daa zoalen yel' wak che Espíritu Santo che'na' le'.

14 Le' ben' bish'dawaa na' le' ben' zandawaa, nezyenid' le ben' wen nakle na' le ba chajniile, na' ba chak wzajniiljwell-le.

15 Na' lee yishi ba biyaxjid' bzej' le' che bal' di-ika' bi chiyal' guetlall'le, la' chaklen Chioza' nad' kwenche

16 chon' xshin Jesucristona' ladj beṅ'ka' bi nak beṅ' Israel. Na' llinni chon' nakan ka xshin b̄xoz, beena' chjwa' lao Chioza' diika' bibi nda' nchen. La' daa choe'len' legake' dill' wen dill' kob che'na' kwenche gonlilall'gake' Cristona', na' yixis yiyib Espíritu Sántona' yichjall'do'eka', na' gakgake' lall' na' Chioza', wak inacho nakgake' ka to dii bibi nda' nchen daa chzanid' wi'ane'.

17 Daa chaklen Cristo Jesús'a nad', chibaid' cho'a dill' chon' xshin Chioza' daa bene' lall' na'.

18 Aga wiyaxjid' wi'a dill' che bichlə dii ba ben', san cho'a dill' ka ba b̄chin Crístona' nad' kwenche zan beṅ'ka' bi nak beṅ' Israel chzenaggake' che'. B̄chine' diika' wnia' na' diika' ben'

19 kon yei' wak che Espíritu che'na' kwenche gok diika' ben ble'i beṅ' na' wyajle'gake'. Wzolz' Jerusalénna' na' wya' axt doxen gana' mbani Ilíricon'a be'len' yog' beṅ' dill' wen dill' kob che Crístona'.

20 Na' ben' byen jtixji'a dill' wen dill' kob che'na' gana' konon' inezin, kwenche bi jachish' jalaṅ' xshin beṅ' yoblə.

21 San kon ka na Cho'a Xtill' Chioza', gana' nan:
 Beṅ'ka' biṅ' gombia'gake' xtilleena', gom-
 bia'gake'n,
 na' beṅ'ka' biṅ' yengakile' xtilleena',
 shajni'gakile'n.

22 Na' ni che llin dga chon' biṅ' gak yid' gana' zoale, la'kzi zan shii ba goklallaa yidwia' le'.

23 Per naa ba biyoll ben' xshin Chioza' doxen gani chda', na' chakid' wak yidwia' le', la' kana'te chaklallaa yid'.

24 Cheenid' tia' gana' zoale kat' sha' Españana', la' cheenid' ile'id' le', la'ch' shloll, kwenche soacho mbalaz. Na' chbez' gakenle nad' kwenche gak kooch' nez.

25 Per naa, yiyaa Jerusalénna' lljasan' dii chyalji ben' bish'choka' lle' na'.

26 La' ben'ka' choe'la'ogake' Crístona' Macedóniana' na' Acáyani do yichj do lall'gake' ba btopgake' mech dii wsel'gake' che ben' yesh'do'ka' len ladj ben'ka' nonlilall' Crístona' Jerusalénna'.

27 Do yichj do lall'gake' chaklall'gake' gaken-gake' legake', na' dii li nakan to dii chiyal' gongake', la' lengake' ba naki chegake' dii wenka' ba bcheb Chioza' che neto' ben' Israel, na' chiyal' yigoogake' wzon che ben' Israelka' we'gake' daa chyaljgak-ile'.

28 Na' ka yiyoll lljasan' mechi dga bengake' lo na', na' kwaa nez sha' Españana' na' tia' yidwia' le'.

29 Na' nezid' kat' yidwia' le', dii xen inleeb gaken Crístona' cho'.

30 Le' ben' bish' na' le' ben' zan', daa nonlilall'cho Xancho Jesucrístona' na' daa chon Espíritu Sántona' ka chaki ljwellcho, chat'yoid' le' gake nad' txen inabgachile Chioza' gaklene' nad' lawi diika' chdil chllag'.

31 Li inabi Chioza' yisle' nad' lo na' ben'ka' bi chonlilall'gake' Crístona', ben'ka' lle' gana' mbani Judeana', na' lekzka' li inabile' sho'lall' bish' ljwellchoka' lle' Jerusalénna' dga lljasan' chegake',

32 kwenche zoa' mbalaz yidwia' le', shi Chioza' gone' latj, na' yiyakshao'lallaa daa soacho txen.

33 Na' Chioza', beena' chon ka zoacho mbalaz, soalenshgue' yog'le. Ka' gakan.

16

¹ Cheenid' gombia'le beṇ' zanchona' le Febe, beena' zoa chaklene' bish' ljwellchoka' nonlilall' Jesucrístona' yell Cencreana'.

² Daa nonlilallee Xancho Jesucrístona', wlebgachlene' do yichj do lall'le kat' yide' gana' zoale, la' kan' chiya' goncho, cho' nakcho lall' na' Chioza'. Na' gaklenene' shi bi dii chyalljile', la' len' ba goklene' zan bish' ljwellchoka' na' lentia' ba goklene'.

³ Li wwapgach chiox Priscílana' len beṇ' che', Aquílana', beṇ'ka' chonlengake' nad' xshin Cristo Jesúza'.

⁴ Legake' bzoa dii nxoll yel' mban che'ka' kwenche goklengake' nad'. Na' aga to nad'zan nia' choxkengake' bengake' ka', san len yog' beṇ'ka' bi nak beṇ' Israel, beṇ'ka' ba nonlilall' Crístona' to to yell gana' jtixji'a xtilleena'.

⁵ Na' lezkza' li wwapgach chiox beṇ'ka' chdop chllag choe'la'ogake' Crístona' lille'ka'. Na' wwapgachle chiox Epenétona', beena' le chakid', beena' gok beṇ' nech benlilallee Crístona' gana' mbani Ásiana'.

⁶ Li wwapgach Maríana' chiox, la' le ba bilal bizodile' kwenche goklene' le'.

⁷ Li wwapgach chiox beṇ' wlall cha'ka' Andróniconá' na' Júniaza', beṇ'ka' wyoolen' txen lillyana'. Nechgake' benlilall'gake' Crístona' ka nad', na' mbejlaogake' ladj beṇ'ka' chjtixjee xtilleena'.

⁸ Li wwapgach chiox Ámpliaza'. Le chakidee daa nake' Xancho Jesucrístona' txen.

⁹ Li wwapgach chiox Urbánona', beena' chonlene' neto' xshin Cristo Jesúza', na' Estáquiza', beena' le chakid'.

10 Li wwapgach chiox Apéleza', beena' ba bli'e chakile' Crístona' do yichj do lallee. Na' li wwapgach chiox Aristóbulona' na' beñ'ka' nake' txen loo yoo lille'na'.

11 Li wwapgach chiox Herodiónna', beena' nak beñ' wlall cha'. Na' lezkka' li wwapgach chiox Narcísona' na' beñ'ka' nake' txen loo yoo lille'na', beñ'ka' nonlilall' Xancho Jesucrístona'.

12 Li wwapgach chiox Trifénana' na' Trifósana', noolka' chon xshin Xancho Jesucrístona'. Na' li wwapgach chiox Pérsidana', beena' le chakicho, la' le ba bilalile' bene' xshin Xanchona'.

13 Li wwapgach chiox Rúfona' beena' le zoacheche' chonlilallee Xancho Jesucrístona', na' lezkka' xneena', beena' chonile' nad' ka xiine'.

14 Li wwapgach chiox Asíncritona', Flegóntena', Hérmeza', Patróbaza', Hérmeza' na' beñ' bish'choka' na' beñ' zanchoka' zoalen legake'.

15 Li wwapgach chiox Filólogona' na' Júliana', na' Nerewa' len beñ' zane'na', na' Olímpaza' na' yog' beñ'ka' zoalen legake', beñ'ka' nak lall' na' Chioza'.

16 Li wwapgach chiox Ijwell-le lega beñ' chaki Ijwellin daa nakle Chioza' txen. Yog' beñ'ka' nonlilall' Crístona' yellka' gana' ba wya' chwappake' le' chiox.

17 Le' beñ' bish' na' le' beñ' zan', li wsak' bi wzenagle che beñ'ka' chon ka chakben' choplæ, na' gongake' ka gakklejile che dill' lina' ba nsedle. Bi gonle legake' txen.

18 Beñ'ka' chon ka' aga chongake' ka cheeni Xancho Jesucrístona', san chongake' daa nazan chegake'. Na' choe'la'o choe' dill'gake' na'

choe'gake' dill' goll-lall' kwenc̄he chonllej
chongangakile' beṅ'ka' chajle'daz.

19 Yog'te beṅ' ba nezgakile' nakle beṅ' wizoa dill',
na' le chiba chizakid' ka chonle. Na' cheenid' gakle
beṅ' sin' kwenc̄he gonchle diika' nak wen na' bibi
dii mal gonle.

20 Na' Chioza', beena' chon ka soacho mbalaz, lii
wlliyi'tie' yel' wak che Satanáza' na' gone' ka wlej
wshoshjlen. Xancho Jesucrístona' gaklenshgue' le'.

21 Timotewi, beeni chonlene' nad' xshin Chioza',
chwape' le' chiox na' lekzka' Lúcioni, Jasónni na'
Sosípateri, beṅ'ki nak beṅ' wlall cha'.

22 Nad', Tercio, chzej' dga na Pábloni, na' lekzka'
chwap' le' chiox daa nakcho Xancho Jesucrístona'
txen.

23 Na' Gáyoni chwape' le' chiox, beeni none'
lille'ni zoanto', na' lekzka' lille'ni no'en kwenc̄he
chdop chllag beṅ'ki choe'la'ogake' Crístona'. Na'
Erástoni, beeni ngoo lo nee mech che yelli, chwape'
le' chiox, na' lekzka' bish' ljwellchoni le Cuarto.

24 Xancho Jesucrístona' gaklenshgue' yog'loltele.
Kan' gakan.

25 Chiyal' we'la'ocho Chioza', beena' wak gone'
ka soachechle gonlilall'lene' daa wyajle'le dill' wen
dill' kob che'na' daa chyixji'a, daa chzajniin cho'
che Jesucrístona'. Nakan daa kono wnezi kani'teyi,

26 per naa, Chios, beena' zoa zejli kani, chaklallee
inezichon, na' ba bene' ka chajniicho diika' bzej dii
beṅ'ka' wdixjee daa golle' legake' kani'yi kwenc̄he
yog' beṅ' lle' doxen yell-lioni shajle'gake'n na'
wzenaggake' cheyin.

27 Toz Chioza' zeelo nake' ben' sin'. Na' chiyal' koochone' balaan zejli kan̄i daa bselee Jesucrístona'. Kan' nakan.

**Dill' wen dill' Kob Che Jesucristona'
New Testament in Zapotec, Cajonos (MX:zad:Zapotec,
Cajonos)**

copyright © 2011 Wycliffe Bible Translators, Inc.

Language: Zapotec, Cajonos

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Cajonos

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

f98bf0c8-4467-559d-82ab-96644a44d38f